



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

18. Kalenderwoche – ab 2. Mai 2010

Lachdaach

Ham Sie das gewussd, dasses een Daach gähm dud, wo das Lachn geährd wird? Ja, e Gedenkdaach fiehrs Lachn! So ähnlich wie dor erschde Mai, was ja dor Daach dor Brolledarier in allor Weld is, odor dor Kinnordaach. So ähnlich duds also ooch een Welddaach fiehrs Lachens gähm! Weil Lachn so gesund is! Das dud von dor UNESCO komm. Die ham fesdgeleeschd, dass jedes Jahr dor erschd Sonndach im Mai dor Weldlachdaach is. Genau - morschn am Sonndach!

Was is da nu zu machn an dähm Daach, frach isch misch? Am erschdn Mai dun de Brolledarier off de Schdraße gehn un dun demongschdriern fiehr ihre Reschde. Am Kinnordaach dun de Kinnor von de Erwachsenen nedd behandeld wern. Da gibbds kleene Iberraschungen fiehr de Kinnor. Eis un Bonbons un so. Un was mach mor nu zum Weldlachdaach? Lachn? Iebor wen? Iebor was?

Es dud ja Leide in dor Weld gähm, die ham beim besdn Willn nischd zu lachn! Ooch wenn isch ma meine Siduadsjohn mid minor Gudstn hährnemm - soviel Grund zum Lachn du isch da nisch findn! Jednfalls nisch off Anhieb an so eim Weldlachdaach! Nee, da muss isch schon e bißl sammln, eh isch da genuch zusamhab, woriebor isch lachn kann. Un isch gloobe, bei minor Gudstn is das ooch nisch viel annersch. Heeschdens wemmor an unsorn Enkl denkn dädn - da hädd mor beede was, woriebor mir lachn kenndn. Vor Freide!

Wobei - mor kann ehm ooch iebor Sachn lachn, die eischendlich nisch zum Lachn sinn. Manschma muss isch ja sogahr iebor misch selbor lachn. Wennsch misch frieh im Schbieschl sähn du - zum Beischbiel. Odor wennsch widdor ma vorgessn hab, ob isch nu das Audo zugemachd hab odor ob

nisch? Un wennsch dann nochma zuriggeladschd bin bis zum Barkbladz un brobiern du, dann haddsch das Audo nadiehrlich zugemachd. Abor wennsch misch nisch gefrachd hab, ob isch zugemachd hab, dann duds, wenn isch zuriggkomm, offn sein. Nee, mor is werglisch manschma selbor dor besde Grund zum Lachen!

Abor mor kann ooch annre auslachn, wennse se zum Beischbiele einfach zu dähmlisch sinn, een Eemor Wassor umzuschubsn! Isch weeb abor nisch, ob die Sorde von Lachn am Weldlachdaach ooch geldn dud? Wenn ja, na, da isses dann einfach mid dor Lachorei - dann bräuschdn mir bloß an unsre Bollediggor denkn! Die dun doch andauornd Munidsjohn fiehr ganze Lachsalven liefern!

Isch gloobe abor, so rischdisch gesund is die Sorde Lachn nisch. Das rischdische Lachen, wo de Lachn kannsd, weil was rischdisch ludisch is, weil was widzisch is... - ja, lachn iebor Widze un Gagsch un so... - das is gesund! Das dud das Zwärschfell belähben! Durschschiddln!

Un die Sorde Lachn dun mir eischendlich bei uns in dor Gabaredd-Gise in Gemnidz andauornd broduziern. Odor ooch morschn im "Schdifd" in Auorbach! In dor Nähe von Dhalheim, Dhum un Gählenau. In dem aldn Gulduhrsaal von dähr riesischn Dexdielfabrig. Da machn mir um finfe "Sexisch for juh" mid Essn un Lachn! Also, dobbld gesund! Moddo: Nach dem Essen sollsd du lachn odor bißl Bleedsinn machn!

Eduard Sachsenmeyer